



Bunita iniciativa di habitante y hobennan

ORANJESTAD – Durante un Accion di Bario den bario di Sabana Basora Noord a constata cu den e compleho residencia di FCCA tin basta necesidad y a constata cu principalmente e parti di recreo, un veld chikito, tabatin mester di un mehoracion. A pone man na obra y hunto cu team, habitante y demas boluntarianan a traha duro pa mehoracion di e veld. Habitantenan a expresa di ta dispuesto pa duna di nan banda tambe pa haci e luga aki un miho area pa biba.

Asina DOW a haci e mondi tras di casnan limpi pa mehora y seguridad. A drecha un cantidad di luz cu tabatin algun aña cu no ta funcionando y a dicidi cu lo mehora e cancha deportivo cu tin na entrada di e compleho di apartamentonan aki di FCCA pa asina e hobennan di e bisindario tin un luga adec-

uado pa recrea practicando deporte.

Boluntario y habitantenan di e bario, a pone man hunto pa drecha y verf vloer di e veld. Hobennan manera Tyron (16) y Suzan Hazel (15) tabata hopi contento pa mira cu tin atencion pa nan tambe. Principalmente Tyron tabatin un preocupacion. “Mi kier pa den e bario nos tin algo di haci pasobra awor e muchanan ta cana den bario sin haci nada. Awor cu e situacion a wordo drecha, nos por bin aki y haci algo miho. Ami mes ta hunga futbol aki casi tur atardi cu mi amigonan. E ta rap y ami ta duna les hunto cu amigonan,” el a expresa.

E veld cu a wordo construi mes tempo cu e casnan di FCCA mester a wordo drecha. Tyron a splica cu e cancha ta hopi malo y tin yen di

buraco den dje cu ora nan cay nan ta rasca nan pianan. “Nos no por hunga bon mas aki pasobra pa motibo di e buracan. Nos ta contento awor.”

Susan Hazel, di 15 aña, tambe ta coopera pa yuda e hobennan di bario. E ta siña e muchanan con pa hunga volleyball. Despues di algun training, a forma un team cu despues kier bay den competencia cun’e. Pa esunnan di e bario cu ta interesa, tur diamars, diahuebs y diadomingo tin weganan riba e veld.

A drecha e backboard di basketball, ta bay pone e haaknan unda pa pone net di volleyball, e golnan chikito lo wordo gevef. Na final e cancha mester por wordo uza pa basketball, volleyball y futbol di sala. Tambe a busca ayudo pa pone heli rond.

Den e proyecto di mehora-

cion di e canchanan, habitantenan mes a coopera cu otro pa drecha e veld. Asina tabatin e ciudadanonan Rafael Figaroa y Dennis Webb, kendenan a duna di nan tempo liber pa yuda Team BoBario. Figaroa a bisa cu nan a dicidi di cera un team di habitantenan di e bario, pa atende y drecha tur e situacionnan malo cu tin eyan. E hobennan mes tabatin hopi peticion pa nan recreacion sano. P’esey a sinta cu tur e mucha y hoben cu a expresa nan deseo.

A sinta cu Team BoBario cu a conseha nan pa forma un comision y asina por brinda nan e apoyo necesario, cual a bin ta tumando luga caba, segun Figaroa. “Mehoracion di

e veld aki ta e producto di tur e reunionnan cu nos tabatin cu Team BoBario.” El a bisa cu tur esaki ta yuda kita e mal imagen di Sabana Basora y ta concentra awor riba cosnan positivo.

Webb di su banda tabatin palabranan similar cu Figaroa. El a expresa cu semper ta husga e muchanan ora cosnan bay robes. Pero pa su dos yiunan, el a dicidi di yuda haci algo positivo pa e muchanan.

“Na luga di sinta critica, mester duna nan algo pa nan cuminsa cun’e. Si bo priminti y no cumpli, bo ta haya muchanan mas rabia.” Tambe el a apela na mayornan pa traha hunto pa lenta e hobennan den forma sano.

Dito Acosta:

Entre comercio y Gobierno ta wak con por yuda facilidadnan deportivo

ORANJESTAD – Despues cu algun siman atras Prome Minister y su ekipo a tuma nota di e necesidadnan den e compleho di casnan di pueblo na Sabana Basora Noord, den fin di siman a regresa arma cu material y boluntarianan pa cuminsa traha. Hunto cu Dito Acosta, encarga cu e parti deportivo, a tuma accionnan necesario pa drecha e mini veld den e bario, caminda muchanan ta haci diferente deporte tur dia.

Acosta a splica cu e vloer ta-

batin kraak den dje y e verf a blikia, e backboard di basket y golnan ta frustia. Cu un lista di necesidad den man, nan a acerca FCCA y otro comerciantenan pa ayudo. E man di obra tabata un combinacion di habitantenan di e bario hunto cu boluntarianan di Ministerio di Asuntonan General. Algun dia prome a laga drecha e kraaknan y e vloer tabata cla. Den e dianan aki ta bay over na pone e hekinan, bin cu gol nobo y tambe instala e backboard y postman.

Acosta tin añanan ta forma parti di e Accion di Bario, caminda ta bishita diferente skina di nos isla pa tene accion di limpieza, asistencia social, chequeo di salud y te hasta control di sangura. Ora cu e bario ta indica cu tin un tereno of facilidad deportivo cu mester di reparacion pa bin bek den uzo, Acosta ta esun encarga pa cumpli cu deseo di e comunidad.

E ta coordina e comunicacion cu e representantenan di e bario of ekipo, ta organisa



un accion comunitario y ta percura pa tin e material y hendenan pa haci e trabou. E efecto cu esaki ta genera den e habitantenan ta uno sumamente positivo cu Acosta a experiencia ya varios biaha. “Nan ta hopi contento y ta logico pasobra na momento

cu hende bin pa drecha cos, ta felicidad pa tur hende.

Mayornan ta feliz di mira nan yiunan hunga den un miho luga.” Un bes cu e trabounan finalisa na Sabana Basora, ta sigui pa e siguiente bario.